


Khet mai Sivai Silah Pingnya

A competition of tiger and frog



Wa, Parauk

Khet mai Sivai Silah Pingnya

A competition of tiger and frog

Cao tiem lih : Yi Yi Naing

Cao Pawd Riieng : Ah Lu

Lox Lai Shiao : Lai Vax

Teei Khaing : lai been Ruching Palaung

Cao Toe Lih : Samlao Pao

Bawg Plih Lih : Bawg (1)

Khix Num : 9 /2021

Author : Yi Yi Naing

Illustrator : Ah Lu

Original Language : Ruching Palaung

Translated Language : Wa

Translator : Samlao Pao


Edition : First Print

Date : Sep /2021

Wa, Parauk
Myanmar

Copyright © 2021, Literature Department Of WBC, SIL


For permission to reuse, contact the copyright holder.



Ditix khet mai sivai kiex mawh paox
gawm moh. Kiex ot tau klieh tau ku ngaix
heue. Tix ngaix khet mai sivai kiex tat rhawm
silah paox ka pingnya pa chix pa tawng heue.




Yam an sivai keed ti sang pex khet mai
ah nin "Maix pon silah ti tiang rawm klawng in
lie? Hoek ax silah paox tiang heue."



Sivai baux ah ka khet "Phan maix pon
silah ax jah khre puh heue." Khet deeh pawk
"Eeu chix " ah nan heue."




Khet hoik dha ti tawng lox sang ah sivai
mai nawh keud ka grawng sang pex sivai heue.
Viang mawh nan ang kiek sivai tawng pa keud
tix heue.



Ngaix khaix khet mai sivai kiex ah paox
silah puh rawm klawng heue. Yam an kiex
niied ti hu toi klawng heue.




Khaix an sivai jah simin tix, ra, loe mai khre ti puh heue. Khet ot khaix sivai mai puh ti giex sidax sivai yam tiang nawh klawng heue. Yam dex hoek plak toi klawng sidax sivai hu piang kaing sivai mai sivuat khet reu sivoe heue.




Khaix hoek kiex plak toi klawng sivai kok ka khet "Hex khet" mai khet deeh pawk lox kok sivai heue. Yam an lox khet ot koe sivoe sivai, mai sivai kiet daoX am kah heue. Sivai ah "Hex khet yuh ka mawx maix hoek sivoe aux lie? yuh nan heue.



Sivai keud daux rhawm tix "Kheu patix khet chix pex aux lie?." Nawh chawk ka khet "Yuh ka mawx maix lheu cheung khaing aux?." Khet pawk ah "Ang maix tawng pingnya aux riangrao aux kawx nie lheu ting khaing maix. Kheu nan aux tom pon rieb silah ka maix" yuh nan heue.




Sivai ang nai rhawm ah ka khet "Ax deeh cheu paox tix bawg." Sivai sau riang tix puh tiang klawng nawh ang tawng viex khet piang sidah tix heue. Viang sivai silah tiang klawng mie bawg kawx kheu sivuad sivai sidah khet yaox ti hoek sivoe heue. Yam kok sivai khet mie bawg angah mawh khet pa ot koe sivoe heue.




Kheu sivai ang pex khet nawh baux ah
yuh nin "Aux ang nyang prah maix pex heue.
Khet ax deeh silah paox tix ceu" khet kawx
khaw rhawm ka lox sivai heue.




Sivai baux ah nin ka khet "Bawg in ax silah ti deeh hao ka priex pa tix awx." Yam an sivai keud daux rhawm "Aux ih totiag ku ceu tom nie khet ang pon ih awm ax nawh yaox ti som bawg in" yuh nan heue.




Sivai bak ti pex khet mai nawh kied gaux rhawm tix heue. Nawh ah ka khet "Maix pon silah mai aux lie? Bawg in ngie ax silah paox hao ka priex ih tix heue." Khet khaw rhawm mai rieb ka lox sivai heue.



Sivai ah nin ka khet "Maix tawng ih aux
nex totiag ku ceu nex moi, poh, lig, krak heue.
Phan mawh maix ang chix pon ih awm aux" ah
yuh nan heue. Khaix an sivai keud khet ti lhat
ka nawh heue.



Khet deeh pawk ah "Hoek lie mawx pa sang jah hao chix heue." Sivai ah "Eeu. . aux sang hao phao ka." Khaix an nawh cuk taix tix daux ghok mai hao si-ang, hauk totiag pa ih lih tom nie heue.




Yam caw bawg yam khet, khet kawx cuk
taix nawh daux ghok mai hao ceu pa koe daux
vaig tix uik heue. Ceu pa hao khet mawh ngie
hauk sivai uik heue.




Yam yaox sivai ka hao khet sivai sidaing
lhat graung ang lai chawk titix nawh niied ti to
khaing tan heue. Kheu kied lhat sivai nawh ang
lai pon gi jhak khet plak khaix mai nawh yuh
lung ti to luan singai heue.




Viang khet iak ding mawx kawx angah khet pon hao ka hauk sivai lih heue. Sivai ting riang mie ding angah ang pon hao si-ang, hauk paox sivai lih heue. Kheu nan sivai ang lai pon hu sikah ka khet cuix kawx heue.



Sivai ang tawng grawng laig hauk nawh daux vaig khet heue. Khet tawng koe hauk sivai tom nie daux jheeh tix. Kiex silah paox phuh tiang klawng mie bawg angah kheu kiied khet sidax sivai hauk sivai naog daux jheeh nawh heue. Kheu nan khet yaox ti hao hauk sivai pa koe daux vaig daux jheeh tix lih uik heue.



Khet ot piang simaox mai nyawm nyiah ka to sivai heue. Nyiah khet ang lai cu ti hoik nawh ngawm ti nyiah it ti nyiah mai keud ka grawng silah kiex paox tiang klawng heue. Khet keud nie kiied sidax sivai tom naog hauk dauh jheeh mai paox ti nyawm nyiah heue. Kheu nyawm nyiah khet nawh loe ti khliak simaox, rhang nawh gleh cawd uik heue.



Mawh kheu to sivai khawm lhat ka nawh khet lih ti koe rhawm lhaong piang cao tix heue. Khaix an khet yaox ti ang koe rhang gleh rhang tix cod uik heue. Jao an khet uik kix yaox ti ang koe rhang tom hoek in singaix heue.



Sivai kawx kix lhat hu daux klawng kheu jao lhat kix ka khet heue. Phan sivai mhong ka yo khet lox yam mawx anghah kix niyet ti to luan heue. Jah yam an tom hoek yam in khet yaox ti nyiah ka sivai heue.



Kawn praix eue. . . daux been in ex kawn
pui caw ti een rhawm koe rhawm pa mhawm.
Paw lhaong rhawm ting jhawm, coca ti gau ka
pingnya awx. Awm yaox sivai krax pie lhien
paw kieh pui tang kaux pie lhien ka piang maix
awx. Son sang ang pui pon ti gut kheem ex,
caw ex ti mawh pui pa koe pingnya pa naog
krax keud uik heue. Been in mawh ngie ding.

